

紅塵瑣記

記壬辰年宜蘭來白頭鶴

悠悠白頭鶴，超逸凌雲煙。越海橫驚浪，跨山度險巔。凜風無情刮，失群斷繫聯。雙雙下蓬島，暗暗棲瓜田。道骨披灰氅，冠頂覆烏氈。引吭歌亮亢，蹈足舞翩跹。紅眼傲濁世，雪頸標靈仙。同依行拘謹，相顧影互憐。卓爾俗不染，無意結塵緣。卑身啄甘薯，潔已飲凡泉。追慕觀如堵，千里只看鮮。舉投皆入攝，癡狂逐麗妍。為求一顰動，徹夜守未眠。同為賞鳥者，愛鳥心各宜。或為填私慾，驚飛四處旋。或為護嬌客，巡察顧周全。白鶴何矯矯，高視邈蟻羶。昂藏志不改，無動人潮前。振翅不回首，芳跡杳青天。來去如飄葉，豈是令威還。萍居雖經月，重遇復何年。何需強留影，倩影印心弦。且隨片羽去，摘彩化詩篇。

讀司馬遼太郎「新選組血風錄」有感

英雄出草莽，崢嶸意氣揚。道場勤鍛鍊，結義氣方剛。遠逐男兒志，上京離故鄉。仗劍護幕府，橫眉亂世匡。磨刀試躍躍，絕技不待藏。松明燃寅夜，慘月影惶惶。薰風寂無色，樹影曳孤牆。突入池田屋(1)，慄銳碎酒觴。抽刀燈即滅，劍氣勝寒霜。斬殺怒雷駭，穿刺疾風狂。羽織浴血海(2)，白巾染紅光。哀嚎破闖黑，腥氣穿脊涼。浪人紛倒臥，奔竄意驚惶。刃影挾星落，遍地塗肝腸。一戰震京邑，名冠壬生狼。剷奸十步內，肅清不計殤。絕殺油小路(3)，袍斷甲子郎。風雲瞬息更，新政應時生。倒幕勢正熾，捨身力挽傾。錚骨義慷慨，灑然赴征程。碧血灑烏羽(4)，硝煙瀾戰旌。槍砲織腥雨，拔刀血軀迎。交刃搏鋒火，磅礴鬼神驚。千彈穿膛裂，仰天肝膽橫。顛骨填溝壑，血幟飄赤誠(5)。拼死守土道，壯懷拋利名。忠節馬革裹，刀魂墟墳縈。時代汰舊物，難遏廢刀成。(6)武士窮末路，夕途踽踽行。雖無西器利，孤刀自有情。長嘯悲蜀鳥(7)，崇道豈學鸚。生時春絢爛，飄零燦落櫻。滿池鏡花月(8)，幾時能再榮。暮雲去幾重，蕭條異代逢。古詩今不愛，舊韻情獨鍾。莫隨世情蕩，堅志烙襟胸。願追武士道，筆鋒作劍鋒。振筆傳古調，開闔誰能封。

詠水雉

菱角葉田田，隱然居謫仙。天光勻粉面，紫氣泛吟肩。(9)
凌去流雲過，飛來舞墨翩。詩名書水上，悠思寄青蓮。

嘗母親便當有感而作

廚灶立萱闈，晨昏炊火輝。炒菁生旱雨，煎蛋映春暉。
粒粒喉溫潤，絲絲情傍依。嘗饘思跪乳，心伴凱風歸。

遊貓空杏花林

杏雨綿施嶺，穠櫻灼夕霓。暮沉星愈熠，枝錯燕頻迷。
飛粉妝銀月，碎紅潤綠泥。清香偏晚郁，春韻滿花蹊。

詠臉書

妙讀臉書聞見鮮，片光流景遐邇傳。悠然打卡存鴻爪(10)，瞬爾留言替燕箋。
何用千金贏一讚，興交四海結多緣。茫茫網浪浮生寄，即事新情埋舊篇。

貢寮海洋音樂祭

綠髮朱顏灘地行，萬千瑩目注高棚。驚天搖滾鰲山動，盪氣唱吟鮫女傾。
舞曳金沙隨款擺，歌邀白浪共歡鳴。溫柔一曲吹星夜，夏夢無邊花火明。

嘗迴轉壽司

迴帶傳饘擇愛希，勾涎碟碟散清醅。鮮開扇貝彈猶嫩，輕炙星鰻滴欲肥。
珠米鮭珍來不盡，羞囊饑腹嘆何微。輪盤轉眼華映過，興比流觴思浴沂。

乘遊輪遊淡水河

滄波白鷺偶生緣，翠黛觀音臥觀舷。十里畫都隨艇卷，一萍漁舸伴潮翩。
虹橋到眼朱騰海，岸樹舒心碧闊天。霞網恢恢收舊事，粼粼遠去逝雲邊。

觀莫內睡蓮圖

繪影描光瞬景前，朦朧印象古今穿。色溶渦石調千彩，筆撼瑤池下九天。
碎揉虹波搖倒柳，偏翻霞酌耀浮蓮。宛然風動雲心漾，隱隱幽香隔畫傳。

詠摩天輪

千輻華輪輳八方，凌雲送客上穹蒼。車潮浩點流螢燦，市彩遠奔河漢泱。
暈掩嶺峰迷遠近，風搖星月共低昂。攀天欲與爭輝麗，無限霓光照夜煌。

遊大湖公園

繞池閒步暫離塵，錦帶橫波連翠濱。求鳳臥蟬歌落蔭，羨魚棲鷺伺垂綸。
曲橋灩灩雲山渡，高樹悠悠天水新。遙見雙禽凌泊逐，依稀施蠹泛忘津。

品香草拿鐵咖啡

隆隆磨豆味悠長，金滴融融熟韻揚。琥珀蓮浮蘆荻雪(11)，瓊瑤蜜注蕙蘭芳。
煙籠駝色溫心闕，杯滑雁痕離夢鄉。醒伴晨陽移几案，慢嘗甘苦遣流光。

詠台大杜鵑花

燦爛齊開恣意雄，豔盈驕日沐春風。
欲承桃李彰天下，笑擁學城氣貫虹。

賣花婦

車陣穿梭蘭蕙飄，嘶聲喚賣幾人瞧。
無情寒凜摧枯草，弱蝶尋芳獨顫搖。

注：

- (1)池田屋事變，新選組斬殺多位尊王攘夷派浪士。
- (2)新選組前期隊服為淺蔥色的羽織。
- (3)油小路事件，新選組肅情叛離的同袍。
- (4)鳥羽伏見之戰，代表新政府軍和幕府軍戊辰戰爭的開始。
- (5)新選組的隊旗為誠字旗。
- (6)日本明治九年頒布廢刀令。
- (7)新選組天才劍士沖田總司因肺結核(咳血)而英年早逝。
- (8)新選組副長土方歲三和隊長沖田總司留有和鏡、水、花相關的俳句。
- (9)水雉的肩泛紫光。
- (10)打卡：臉書上標記所在地點的功能。
- (11)形容咖啡的拉花和奶泡。